



Inatsisartuni ilaasortamut
Hans Enoksen-imut
Naleraq

05-08-2024
Sags nr.
Akt. id. 24437645

Postboks 260
3900 Nuuk
Tlf. (+299) 34 50 00
Fax (+299) 34 63 64
E-mail: isn@nanoq.gl
www.naalakkersuisut.gl

Aalisartut, piniartut savaatillillu nuliaat aammalu arnat kisimiittut angerlarsimaannartut eqqarsaatigalugit meerartaarnerminnik erninersiutit tigusartagaat pillugit § 37 naapertorlugu apeqummut nr. 168- 2024-mut akissut

Asasara Hans Enoksen.

Qujanaq apeqquternut. Apeqqutit ataasiakkaarlugit ataani ilarneqarput, apeqqutillu akissutaat apeqqutit ataanni allanneqarlutik.

1. Aalisartut piniartut savaatillillu nuliaat aammalu arnat kisimiittut angerlarsimaannartut eqqarsaatigalugit meerartaarnerminnik erninersiutit tigusartagaat sooq allanut arnanut atorfilinnut sulisartunullu naleqqiullugit tigusartagaat meerartaarnerminni appasinnerusarnerannut suut pissutaappat? Tassami meeraq inunngortoq allatulli meeraavoq anaaminik isumassorneqartussaq.

Meerartaarnermi erninersiutit angajoqqaat erninnermut atatillugu sulinngiffeqarnerminni aningaasanik ikiorserneqarnissaat siunertarivaat, taamaalillutik inoorlaajutertik inunngoqqammernerani ilaginissaannut periarfissaqarniassammata aammalu ilaqutariinneq peqqissumik aallarnerneqarniassammat.

Angerlarsimaannartut atorfillillu erninnerminnut atatillugu sulinngiffeqarnerminni aningaasarsiaasa annertussusaasa assigiinngissutaat annerpaaq tassaavoq aalajangersimasumik atorfillit sulinngiffeqarnerminni sulillutik iluanaarutissarigaluarlugit annaasaat taakkunanik taarserneqartarmata.

Aalajangersimasumik atorfillit meerartaarsimallutik sulinngiffeqarnerminni akissarsiaminnik annaasaqartarmata, angajoqqaanngorlaat erninnermut atatillugu aningaasat taarsiullugit tigusartagaqartinneqarnerisigut allanngujaatsumik aningaasanik isertitaqartarnissaat inuuniarnermikkullu pitsaasumik atugaqaannarnissaat anguniarneqartarpoq. Angerlarsimaannartut akissarsiaqarlutik isertitaqartanngimmata iluanaarutissaraluanik taarsigassaqarneq ajorpoq. Angerlarsimaannartut erninnermusiaralugit tigusartagaasa aningaasatigut qaffasissusaat meeraaqqap atorfissaqartitaata pingaarnerpaartaasa aningaasatigut nalingat matussusertussanngorlugit qaffasissusiligaapput. Aalajangersimasumilli suliffillit meerartaarsimatillutik erninnermusiatut tigusartagaasa aamma siunertarivaat,



angajoqqaat tamarmik meerartaarsimatillutik aningaasatigut annaasaqaateqarnissamik ernumassuteqaratik sulinngiffeqarallarnissaminnut kajumissaarneqarnissaat, taamaalilluni aamma naligiissitaaneq qulakkeerneqarsinnaammat aammalu suliffeqartut suliinnarnissaat anguniarneqarsinnaalluni.

2. Suna pissutaava aningaasat tunniunneqartartut aalisartut, piniartut savaatillilu nuliaannut kiisalu arnanut kisimiittunut angerlarsimasut sooq inuit taakku taaneqartut immikkoortinneqartat?

Suliami uani angerlarsimaannartut qitiusumik pineqarput- aappaasut inuuniutaat pineqanngillat. Aningaasat tigusartakkat annertussusaat aningaasatigut atorfissaqartitanut, sulinermi ajunngitsorsianut annaasimasanut taarsiissutitut, inuiaqatigiinnilu suliffeqartuunerup tapersersorneqarnissaanut aammalu ilaqutariit qajannaatsumik aningaasatigut isertitaqarnissaanut tulluussagaapput.

3. Qulaani taaneqartunut aalisartut piniartut savaatillit nuliaannut aammalu arnanut kisimiittunut aningaasat erninersiutit qanoq annertutigisumik aningaasanik meerartaarnerminni erninersiuteqartinneqartat? Ersarissumik kisitsisinngorlugit annertussusii paaserusuppakka.

Arnat aalisartunut, piniartunut savaatilinnullu nuliaasut angerlarsimaannartut arnallu kisimiittut angerlarsimaannartut tunngaviusumik sapaatip akunneranut 14-tiimit nalinganut meerartaarnermi erninersiutitik tigusartagaqarnissaminnut pisinnaatitaaffeqarput. Meeraartaarsimanermi erninersiaqarluni tigusartakkat taakku, 2024-imi akit qaffasissusaat malillugu, tiimimut 106,47 kr.-iupput. Taakkulu SIK-mut akissarsianut isumaqatigiissutaasut malillugit, ilinniagaqanngitsut 18-leereersimasut akissarsiaasa minnerpaaffissaat, sapaatip akunneranut 1.490,58 kr.-iusut (106, 47 kr. x 14 timer) naleqqatigaat. Annerusumik isertitaqarsimallutik pappillissatigut uppernarsarsinnaagunikku taava sapaatip akunneranut 40 tiimit nalinganut tigusartagaqalersinnaatitaapput.

Meerartaarsimalluni erninersiat tigusartakkat annertussusissaasa kisinneqarnerani qaammatit pingasut kingulliit isertitarisimasat isiginiarneqartarput. Isertitali amerlassusaat allanngorartuuppata qaammatit pingasut kingulliit isiginiarneqaratik, ukiup ataatsip iluani isertitarisimasat isiginiarneqartarput. Saniatigut isertitaqaraanni, imaluunniit ilinniartuugaanni, aamma taakkua ilanngullugit kisitsinermi ilanngunneqartussaasut eqqaassallugu aamma pingaaruteqarpoq. Meerartaarsimalluni erninersiat tigusartakkat sapaatip akunneranut annerpaamik 40 tiimit nalingat tigusartagarineqarsinnaapput, qanorluunniit isertitaqarluni akissarsiffiit arlaqartigigaluarpata. Sulinngiffeqarnermi akissarsisoqartarpat taakkua aamma ilanngullugit tiiminut kisitanut ilanngunneqassapput. Taamaammat akissarsiat erninermusiallu sapaatip akunneranut 40 tiimit nalingat qaangerneqarsinnaanngillat.

4. Tamakkiisumik arnanut allanut meerartaarnikunut atorfilinnut allanullu tunniunneqartartunut naleqquttunngorlugit annertussusilerlugit tunniunneqartalissappata aningaasat qassit pisariaqartinneqassappat aammalu suminngaaniit aningaasalerneqassappat?

Arnat angerlarsimaannartut erninermusiaat arnat aalajangersimasumik atorfillit erninermusiaannut nalimmassarneqassappata, sapaatip akunneranut aningaasat 14 tiimit sulilluni aningaasarsiasat nalinganiit sulinermi 40 tiimit sulisimagaanni aningaasarsiasat nalinginut qaffanneqassapput. Tassa imaappoq sapaatip akunneranut agguaqatigiissillugu 1.490,58 kr.-iniit (106, 47 kr. x tiimit 40-ut) 4.258, 80 kr.-inut qaffassapput (106, 47 kr. x tiimit 40-ut). Tamanna arnap sapaatip akunneranut tigusartagaasa 2.768,22 kr.-inik qaffanneqassagaluarneranik isumaqarpoq. Ernismalluni sulinngiffeqartarneq naliginnaasumik sapaatit akunnerinik 19-inik sivisussusilik 28.321,02 kr.- inik naleqartoq (1.490,58 kr. x sap.ak.19) 80.917, 20 kr.-inut



qaffassagaanni (4.258,80 kr. x sap.ak.19), agguaqatigiisillugu arnamut ataatsimut aningaasatigut qaffaaneg 52.596, 18 kr.-inik naleqassaaq.

Aningaasaqarnermut inatsimmi 2024-moortumi suliassaqaarfimmut 26. mio.kr.-it illikartinneqarsimapput. Angerlarsimaannartunut meerartaarsimalluni erninersiat tigusartakkat qaffasinnerpaaffissaannut inissinneqassappata meerartaarsimalluni erninersiutit tigusartakkanut aningaasartuutit ukiumut illikartittakkat qaavatigut 30.-35. mio.kr.-inik qaffanneqassapput.

Aaqqiissummut tassunga aningaasartaliissutissat politikikkut pingaarnersiulluni aningaasaliisarnikkut aalajangerneqarumaarput.

5. Pissutsit tamakku meerartaarnermi atugassarititaasut assigiinngitsumik atugassaqaartitsillutik Naalakkersuisut ilisimavaat?

- a) Naalakkersuisut qanoq aaqqiissuseqarniarpat?
- b) **Arnat atugaasa assigiinnginngisneqartut meerartaarnermini atugaat pillugit allanut arnanut naligiissinneqalissappata aningaasat aaqqisoqarnissaanut qanoq annertutigisut pisariaqartinneqarnersut ilanngullugit ersarissumik paaserusuppakka.**

Naalakkersuisut arnat meerartaartorlutillu angerlarsimaannartut immikkuullarissumik atugaqartuusut eqqumaffigalugillu ilisimasaqarfivaat.

Ernisimanermi sulinngiffeqartarnermut atatillugu suliassaqaarfimmik iluarsaasseqqinnissami taakku atugaat pillugit isummersuutit ilanngussuunneqarumaarput. Iluarsaasseqqinnissamut atatillugu namminersorlutik suliffeqartut atugaasa pitsanngorsaaffigineqarnissaannut periarfissat, angajoqqaat erninermut atatillugu sulinngiffeqartarnerisa tallisinneqarnissaanut perarfissat aammalu LGBT+-p ataaniittut angajoqqaat eqaannerusumik pineqartarnissaannut periarfissat aamma misissorneqassapput.

Apeqqutip ilassutaata b-ip akissutaa apeqqutip 4-ap akissutaanut unnersuunneqarpoq.

Naalakkersuisut suliassaqaarfiup iluarsaateqqinnissaata piviusunngortinnissaanut aningaasat sakkussallu pisariaqartinneqartut nassaarinissaat tunniusimaffigaat, arnat meeqqiortut tapersersorneqarlutik, meerartaarsimallutillu erninersiutinik tigusartagassaralugit pisinnaatitaaffigisaminnik, naleqqatigiittumik naapertuuttumillu pisarnissaasa qulakkeernissaat aamma tunniusimaffigaat.

Inussiarnersumik inuulluaqqusillunga

Jess Svane